



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LEKUCALA (P1)

LWETI 2011

EMAMAKI: 70

SIKHATSI: 2 ema-awa

Leliphepha linemakhasi la-13.

TICONDZISO KULABAHLOLWAKO

1. Leliphepha lehlukaniswe tigaba LETINTSATFU:
SIGABA A: SIVISISO (30)
SIGABA B: SIFINYETO (10)
SIGABA C: LUHLELO NELULWIMI (30)
2. Fundza tonkhe ticondziso ngekucopelela.
3. Phendvula yonkhe imibuto ngeSiswati.
4. Cala lesa naleso sigaba ekhasini lelisha
5. Dvwebela ekugcineni kwaleso naleso sigaba.
6. Tinombolo tetimphendvulo atihambisane naleto letisephepheni lemibuto njengobe tinjalo.
7. Shiya umugca emkhatsini wetimphendvulo takho.
8. Bhala ngebunono nangesandla lesifundzekako.
9. Caphelisisa sipelingi/lupelomagama nendlela lewakha ngayo imisho

SIGABA A: SIVISISO**UMBUTO 1****ITHEKSTHI A**

1.1 Fundza lethekesthi lelandzelako bese uphendvula imibuto letawulandzela.

Yachamuka imoti lebovu. Yaya ngekwehlisa sivinini. Yefike yasima embikwesihlahla semvangati, savuleka sivalo. Yinhle lemoti bo! Ngunalu luhlobo lolusembili. Lena-ke ibhalwe kwekutsi DYP 075 GP. Lapha ekhatsi kukhala umculo lomnandzi welukhetselo. Ngemuva kwesihlahla kwatsi chamu tfushu, litjitjana lekubonakalako nje kutsi kusete umuntfu lapha, mane nje ngumtinja. Kutsite bebahlangane, bacabuzana bantfu bakhona, kwaye kwakhanya kutsi abatsandzani, babutsana phasi.

"Kunjani vele Lungi, mntfwanaketfu? Awati mani mine shengatsi ngabe solo asikabuyi lena eThekwini. Solo ngakubeka nje nasibuyako ngalamaholide akhisimusi, sitfombe sakho asisuki lakimi. Sengife kutikhumbulela wena. Lihora linye ungekho, lifana neminyaka letinkhulungwane," kusho lendvodza yemoti itibukela lesincanakazane sayo.

"Kuyalunga nje lokungasho lutfo Joe. Nami besengikukhumbulile", sekuphendvula Lungile, abonakala kutsi sifo selutsandvo sesidlala ngaye naye. Kubonakale kutsi Lungile akatsakasi njengalokwetayelekile nakanalomuntfu wakhe. Abute lobabe kutsi ngabe sizatfu yini.

"Eyi Joe, vele kubi mani. Sekonakele lapha. Mine bengisolo ngingaboni, kodvwa ngetfuke sekunjalo nje. Seyesitsatfu nje lenyanga," asho Lungile asavele anconcobele.

Ngekuphatima kweliso, tajika tinfo. Yajika indvodza yaba mnyama yatsi khwishi. Loko kumamatseka lokugcwele lutsandvo kwajika kwaba kuswaca lokugcwele intondvo. Wamangala Lungile kutsi sewone ngani ngekubikela Josefa Fakudze ngaloludzaba. Watibuta ngekhatshi enhlityweni kutsi kantsi uma umuntfu atetfwele, akambikeli yini lowo longuyise weluswane kusesuka phansi konkhe.

"Lungile, ucinisile yini ngaloku lokushoko?" Kubuta yena Fakudze, solo simo sakhe setfusa sibili.

"Ngicinisile sitsandvwa sami, uyajabula yini wena?" Kuphendvula Lungile solo etfuswe simo saFakudze. Kwaba shengatsi Lungile uchubisela linyeva ekhatsi. Kuso leso sikhashana, Lungile abone Joe asacwabitela etulu, sifuba sakhe sesitsi fuku fuku asagcwele lunya lolubi.

"Lalela lapha wena, lentfo lowuyikhulumako ngitsi angivani nayo. Uyeva? Watsini wena kimi? Angitsi watsi angingesabi lutfo? Kwakho loko hhayi mine Joe Fakudze! Wena bekufanele utinakekele, ungamane uhlomeke nje. Kusemhlabeni lapha nangabe ungati. Sesiya kutjela-ke tsine boJoe. Ngiyetsembe uyeva Lungile kutsi ngitsini? Yibambe lapho ngobe angifuni nekuyiva lendzaba yakho ikhulunywa itsintse ligama lami. Uyeva? 'Ngitsi kuwe lamuhla kuyaphela kwetfu nawe. Uma unenkhani, utawudzabula emafu, uphambane nemvula ngalokukhulu kutumeka," washo Fakudze wangena emotini yakhe.

Yesuka ngalelikhulu litubane imoti seyibheke khona elukhalweni. Wema Lungile, wayibona iphikelele kuyewushobela. Wema umntfwanaGama, kwaba shengatsi ingcondvo ayisebenti kahle. Bantfu wababona batihambela batijabulele. Labanye bemele ibhasi khona lapho eceleni kwesitolo. Abamekhuti ngani nje Fakudze sekucabanga ingcondvo yaLungile solo idvuma.

Wasibuka sihlahla sabo semvangati. Wasisusa phansi wayosibeka etulu. Watibona tinyoni tinjilota etulu. Nato tihamba ngatimbidlana. Vele, lesihlahla siyinzawo yetitsandzani. 'Lomvangati waze waba nelunya-ke', sekucabanga Lungile. Awusamekhuti naFakudze kulesento sakhe. Awusamkhumbuti nekutsi wona bewufana neligede leliholela kulamakhulu emave nemadolobha etitsandzani. Nome batawuyaphi, benteni Lungile naFakudze bebakhandzana kulesihlahla sesivumelwano. Wasenyanya Lungile ngalelo langa. Wasicalekisa.

"Bindza uze ufe sihlahla selunya."

Wawadla ematsambo engcondvo umntfwanaGama. Kulowo mnyama, abone kutsi kuncono ashaye lucingo luye ekhaya kaFakudze. Wakhumbula Lungile kutsi Fakudze akatsandzi kutsi yatiwe lendzaba yekutsandzana kwabo.

"Bungamane bucitseke bugayiwe", washo wacondza esitolo asayewucela kushaya lucingo. Waba nenhlanhla, bamvumela. Lwasho lwangena.

"Hello, kukaFakudze ekhaya, siyakusita?" kukhuluma livi ngale.

"Yebo, ngicela Joe."

"Bamba kancane sengibute kumake", kusho sidzandzane lesisebentako. "Bafuna bani lapho?" Kubhavumula umkaFakudze, LaNkosi lobekangakatfukutseli nje agane lunwabu ngendzaba yekutsi Fakudze bekamshiye kabuhlungu kantsi phela bebetsembisene kuya kamzala wabo ngalelo langa.

"Utsi lodzadze ufuna Joe ye make."

Watfukutsela wagcwala kokane LaNkosi neva lelitsi lodzadze.

Wasukuma walutsatsa matfupha lucingo

"Ngiyakusita?" Kubuta LaNkosi.

"Besengishito kutsi ngicela Joe."

"Ungubani wena locela boJoe lakimi?"

Phendvula yonkhe imibuto ngekubhekisa tonkhe timphendvulo takho kuletheksthi lengenhla.


1.1.1 Usuke entani umuntfu nangabe adla ematsambo engcondvo? Khetsa imphendvulo kuletilandzelako:

- A Usuke anatsa tjwala
- B Usuke acabanga
- C Usuke adla inyama yenhloko
- D Usuke abulawa yinhloko.

(1)

- 1.1.2 Bhala kube KUNYE lokwenta Lungile kwekutsi atsandzane naJoe Fakudze. (1)
- 1.1.3 Caphuna umusho lokuletheksthi lonenchazelo lefanako naloku lokulandzelako:
"Kungamane konakale nasekunje" (1)
- 1.1.4 Bekasho kutsini Fakudze nakatsi Lungile utawudzabula emafu, aphambane nemvula? (1)
- 1.1.5 Loku naku kuyabonakala kwekutsi Lungile ute makhalekhukhwini, kepha ukhonile kufika ngesikhatsi lapha esihlahleni semvangati. Shano YINYE indlela locabanga kutsi bebatsintsana ngayo kwekutsi kufanele bahlangane ngalelo langa nangesikhatsi lesifanele. (1)
- 1.1.6 Lenzaba lesiyifundza kuletheksthi lengenhla ngabe yenteka ngayiphi inyanga? Bhala ligama lalenyanga ngeSiswati. (1)
- 1.1.7 Bhala KUNYE lokungentiwa yiNingizimu Afrika lensha ekucedzeni tinkinga tetenhlalo njenganati lesititfolo kuletheksthi lengenhla. (1)
- 1.1.8 Ngabe umkaFakudze wamphendvula watsini Lungile ngalesikhatsi afona atsi ufuna Fakudze? Beka liphuzu libe LINYE. (1)
- 1.1.9 Ngabe liciniso yini nobe ngemanga kwekutsi Fakudze naLungile wakhe bebavakashele esifundzeni saseLimpopo? Sekela imphendvulo yakho. (2)
- 1.1.10 Chaza lombono lotsi LaNkhosi, umkaFakudze beyingambamba ingculazi nasibhekisa kuletheksthi lengenhla. (2)
- 1.1.11 Ngaphandle kwekutsi Fakudze unemfati, kungabe yini lokunye LOKUBILI lokwenta kwekutsi awubalekele lomtfwalo lawutjelwa nguLungile? (Ungabhali kutsi unemfati) (2)
- 1.1.12 Wena ucabanga kutsi Joe Fakudze bekahlala kusiphi sifundza/iphrovinsi lapha eNingizimu Afrika nawubhekisa kuletheksthi? Usho ngani? (2)
- 1.1.13 Kukhanya kamhlophe bha kwekutsi boFakudze naLungile bebatsandzana ngobe Lungile wamgana. Nobe kunjalo Fakudze simfanele sandla semtsetfo. Chaza tizatfu tibe TIMBILI letingambophisa. (2)
- 1.1.14 Nangabe Lungile utawubeleka ngalokwetayelekile, wena ubona kwekutsi sekusele tinyanga letingaki kwekutsi abeleke nasifundza letheksthi? Sekela. (2)

1.2 Fundza lesibonwa lesingentasi bese uphendvula imibuto letawulandzela.

ITHEKSTHI B

- 1.2.1 Bhala KUNYE lokukhombisa kuhambelana kwekugcoka kwalentfombatana naloku lokwenteka kulesibonwa (1)
- 1.2.2 Wena ucabanga kutsi kunani kulesikhwama lesiphetfwe ngulentfombatane? (Khetsa imphendvulo lengahambisani nanati letilandzelako)
- A Kwekutilungisa buso.
B Uphetse kwekugeza
C Uphetse ingubo yekulala.
D Lijazi lemkhwenyane/ikhondomu. (1)
- 1.2.3 Shano ingoti ibe YINYE lengahle yehlele lentfombatana lekulesibonwa. (1)
- 1.2.4 Shano kube KUNYE lokwenta utsi lemoti ikulungele kuhamba emgwacweni ngekwemtsetfo. (1)
- 1.2.5 Ngekubona kwakho, loku lokukulesibonwa kwenteka ngasiphi sikhatsi semnyaka? Sekela iphendvulo yakho ngalokubona kulesibonwa. (2)
- 1.2.6 Uma kungatsiwa lomshayeli walemoti utsandza emantfombatana, kungamfanela yini? Beka umbono wakho. (2)
- 1.2.7 Lesibonwa lesingenhla lesikutheksthi B sinabuphi budlelwano nalenzaba lekutheksthi A? (2)

SAMBA SIGABA A: 30

SIGABA B: SIFINYETO**UMBUTO 2**

Fundza letheksthi lelandzelako bese uyayifinyeta ngewakho emagama langabi ngetulu kwala-70.

- Finyeta ngewakho emagama.
- Sifinyeto sakho asibe ngendlela yetindzima (emapharagrafu) NOBE indlela yemaphuzu lasikhombisa **ngesimilo saThandi naSimangele**.
- Khombisa linani lemagama lowasebentisile ekugcineni kwemphendvulo yakho.

BoSimangele naThandi besuka seliya kunina, sebalibangise 'e-Newscafé.' Batishaye ngabokejana labaveta imicaliselo nabahamba, neticatfulo temantontolwane, emadvolo sebawagobe ngatsi talukati letiphETFwe ngemadvolo nemacolo. Phela bobabili bafundza libanga lelishumi nakubili. Bahamba nje baphuma esikolweni, nemsebenti wesikolo abakawenti, ngisho newasekhaya imbala abakawutsintsi. Bese kungemalanga lamatsafu alandzelana baphuma esikolweni batiyele kanhlituyongiyise.

"Thandi mngani wami, uyati mine ngomile, nasifika nje lapha ngibita iniphi yetjwala, ngiyacabula, ngembikwekutsi boSipho basitsengele lokuya etfunjini, siphumute tingcondvo tetfu kulomsebenti wesikolo lesisolo sitjelwa ngawo busuku nemini."
"Mine ngatsi ngitawucala ngekubhema insangu kucala ngivule ingcondvo yami ngembikwekukhuluma naJabulani."

Bahamba bacoca nje bayewugibela itekisi lebheke edolobheni lelikhulu iNaspoti lapho bayotijabulisa khona.

"Asambe siyohlangana naboSipho 'e-Newscafé' batewusitsengela tinatfo neligwayi, mine sengifile koma, wena-ke?" Kubuta Simangele.

"Vele mngani, uyibutelani ibhasi ibhaliwe? Kuyatisho nje kutsi vele sifanele kususa lokoma lokubangwe nanguletifundvo letisicefe. Mine nje kusasa umuntfu angangibuta umsebenti wesikolo ngitawuphuma ngishaye sicatfulo kuthule umoya, "kuphendvula Thandi.

Nembala befika 'e-Newscafé' imbita iviwa ngelutsi, kwaba nguwe tjwala, nsango, wena tidzakamiva. BoSipho naJabulani bebadzilika ngemali yasemnotfweni. Badzakwa baba yinhlama boSimangele naThandi, bangatati nemagama abo.

Sikhatsi besekusemkhatsini walamabili ebusuku. Babatfwala boSipho naJabulani babayisa emakamelweni abo ehhotela lakanokusho i-City Lodge lapho balala khona. Kutsite ngentsatsakusa bavuka babamukisa emakhaya lapho befika bageza ngalokukhulu kuphangisa sebalibangise esikolweni.

Thishela wabo weSiswati wabatjela kutsi kufanele kubhalwe sivivinyo sekuphela kwenyanga letawubalelwa emsebenzini wabo wemnyaka, njengobe kwavunyelwana. Waphakamisa sandla Thandi wevakala asho ngalokukhulu kwedzelela, "Kantsi sesitawubhala tivivinyo onkhe lamalanga? Asiwubhaleni kuleliviki lelitako lomsebenzi. Tsine asikatilungiseleli kahle kubhala lesivivinyo" Lavungama liklasi lihlokoma ngalamavi aThandi, "Kudzala sasilungiselela tsine lesivivinyo, siyasibhala wena Thandi." Ucinisile wena Thandi, kantsi vele kuyasa kubhalwa tivivinyo nje kwente njani? Sifundza nini?" Washo wahlaba umnyango waphuma, naSimangele washo amlandzela.

Baphuma bacondza khona futsi e-'Newscafé' lapho befika batitika khona ngetinatfo letitidzakamiva batsi basusa kwenyanyiswa nguthishela wabo weSiswati. Konkhe loku kwenteka nje batali babo bacabanga kutsi bantfwababo basesikolweni kantsi bashaye phasi kwabhunya lutfuli.

SAMBA SIGABA B: 10

SIGABA C: LUHLELO NELULWIMI

UMBUTO 3

Fundza letheksthi lelandzelako bese uphendvula imibuto letawulandzela.



3.1 Ngubaphi bantfu emangweni labangazuza ngekulandzela lesikhangisi? (1)

3.2 Yini lebangela lokhangisako asebantise tihlavi letinkhulu naletigcamile kulomusho lolandzelako?


'VULEMEHLO NGWANE, TITSELO, SHIZI NELUBISI KUYAPHILISA!!!'

(1)

- 3.3 Ibaluleke ngani ideli kulesikhangisi? Khetsa kulokulandzelako.
- A Kulapho kutsengiswa khona titselo.
 - B Kulapho kutsengiswa khona tibhidvo.
 - C Kulapho bantfu bativocavoca khona.
 - D Kulapho kutsengiswa khona lubisi nashizi. (1)
- 3.4 Lesikhangisi sihambelana njani nalabantfu lababili labagonene? (1)
- 3.5 Khokha umusho lotsatsa luhlangotsi kuletheksthi lengenhla bese udvwebela emagama lekunguwona wona latsatsa luhlangotsi. (2)
- 3.6 Faka inselelo kunankha emavi lalandzelako latsetfwe kulesikhangisi:
- "Bantfu labadla titselo, behlise ngelubisi ababanjwa yingculazi futsi abafi." (2)
- 3.7 Khokha saga lesikulesikhangisi usibhale phasi bese uyasichaza kutsi sishoni. (2)
- [10]**

UMBUTO 4

Fundza lekhathuni lelandzelako bese uphendvula imibuto letawulandzela.



- 4.1 Kulekhathuni khokha umusho locuketse lesinongo lesilandzelako: siphukuto. (1)
- 4.2 Abefanele ayibeke njani inkhulumo yakhe lomfana letsi "wena lohlala udzakwe kangaka?" kute ivakale ihlonipha? Bhala lenkhulumo lehloniphako. (1)
- 4.3 Phindza ubhale lomusho, endzaweni yeligama lelidvwetjelwe faka mcondvofana walo lotfolakala kulekhathuni lengenhla. Nitawuphetsa ngekuba ngemazimu uma nichubeka ngalendlela. (1)

4.4 Sisho kutsini lesisho lesitsetfwe kulekhathuni lengenhla? (Khetsa imphendvulo):

'Seningumhlambi lotelusako'

- A Labafana belusa imihlambi yakubo.
- B Labafana sebayatentela nje abasalawulwa ngumuntfu.
- C Labafana batintsandzane abanabatali.
- D Labafana bedzelela njengemhlambi yetimbuti. (1)

4.5 Kuletheksthi lengenhla khokha umusho locuketse luvelomagama bese uyasho kutsi hlobo luni lwelovelomagama. (2)

4.6 Abecondzeni lomfana ngalamagama latsi "maluju jaha lakitsi!?" Chaza. (2)

4.7 Kulekhathuni lengenhla caphuna umusho lochaza kutsi Siphso abemedzelela lomfana lakhuluma naye. (2)
[10]

UMBUTO 5

Fundza letheksthi lelandzelako lenemaphutsa elulwimi bese uphendvula imibuto letawulandzela.

Tikolo tetfu talapha ka-Nyamazane tisebenta ngekutikhandla lokukhulu. Nangabe uyibukisisa lendzawo, bonkhe bantfu bafikelwa yinjabulo. Ekupheleni kwemnyaka kukhala tigubhu letijabulisa bonkhe batali. "Batali bami bayayitsandza lendzawo yetfu yenjabulo ngako-ke asiyiphatseni kahle," kusho Lungile Bhembe kuTfolakele. Bapheki babaphekela kahle bafundzi kudla lapha esikolweni ngaso sonkhe sikhatsi. Phela kusabusa sintfu kulendzawo. Bafundzi bahlala bagubha lukhula lolungahle lungcolise letikolo letinhle nakangaka. Babuyela emakhaya badziniwe kepha bajabulele kwekutsi basebentile.

5.1 Phindza uwubhale lomusho bese kutsi egameni lelimnyama ujobebele sijobelelo -ana.

Ekupheleni kwemnyaka kukhala **tigubhu** letijabulisa batali. (1)

5.2 Lungisa leligama lelimnyama kute livumelane nekubhalwa lokusemtsetfweni weSiswati. Khetsa kulalandzelako:

Tikolo tetfu talapha **ka-Nyamazane** tisebenta ngekutikhandla.

- A Kanyamazane
- B Ka Nyamazane
- C Ka-Nyamazane
- D KaNyamazane (1)

- 5.3 Khokha umusho loneselulo (imphambosi) sekwentela lesikhomba indlela kuletheksthi lengenhla uwubhale phasi. (1)
- 5.4 Cedzela lomusho lolandzelako ngekufaka umusho lokhontile lomele sizatfu lotakhele wona.
Batali bami bayayitsandza lenzawo (1)
- 5.5 Cala lomusho lolandzelako ngeligama lelikubakaki.
Bafundzi bagubha lukhula. (Lukhula ...) (2)
- 5.6 Sebentisa sento 'bhala' ekwakheni letindlela tesento letilandzelako:
5.6.1 Indlela lesalibito (1)
5.6.2 Indlela lephocako (1)
- 5.7 Bhala lomusho lolandzelako ube yinkhulumombiko.
"Batali bami bayayitsandza lenzawo yetfu yenjabulo," kusho Lungile Bhembe kuTfolakele. (2)

[10]**SAMBA SIGABA C: 30**
SAMBA SAKO KONKHE: 70